

Manfron, et de li tre contestabeli nostri fono mandati, do erano zonti, zoè Zanon da Colorgno con provisionati fati per lui, et Jacometo da Novelo, va governador in Cypro, con . . . . .; mancava el Bergamo, qual sarà doman li. *Etiã* per Colegio fo scritto de li che Batista Doto dovesse far fanti etc.

Noto. Come eri fo mandato in campo ducati 4500; et perchè erano di altri a Vizenza per mandarli tutti in campo etc.

*Election di capetanio a Padoa.*

† Sier Domenego Contarini el provedador zeneral in campo, qu. sier Mafio	721.459
Sier Piero Lion, fo consier, qu. sier Mafio . . . . .	508.676
Sier Andrea Loredan, fo Cao dil Consejo di X, qu. sier Nicolò . . . .	361.822
Sier Michiel Navaier el consier, qu. sier Lucha . . . . .	418.755

*Etiã* ozi fu electo il terzo provedador a la iusticia nuova, iusta la parte presa, sier Trifon Gradengo el XL zivil qu. sier Lionelo.

Fu posto, per li consieri, di risalvar .l. capitanià di Padoa a sier Domenego Contarini, qual se ritrova provedador nostro zeneral in campo senza alcun salario, et possi acetar zorni 8 poi el sarà tornato in questa terra, come ad altri è stà fato; et fu presa.

161 *A dì 30, luni.* Da matina veneno in Colegio sier Faustin Barbo e sier Zuan Antonio Venier ritornati syndiei da terra ferma, vestiti di scarlato a manegogal, acompagnati da alcuni zentilhomeni. Et il Venier, per esser più zovene, referi dicendo molte cosse, e come era stà bon la sua andata si per la Signoria nostra qual per contento di popoli; ma non erano stafi in l' Istria, et è partiti de Portogruer per venir a repatriar, iusta la parte presa e licentia auta etc. Il Principe li usò poche parole, dicendo per zornata si vederano le operation loro. Questi disseno aver recuperato in la Signoria ducati 9000; è stafi fuora mexi otto e più. E il zorno sequente, sier Zuan Antonio Venier andò in Quarantia criminal come avochato; siehè sarà avochato *ut ante*.

*Dil capitano zeneral nostro fo letere drizate a la Signoria, date in Cremona a dì 27, ore una di note.* Avisa il successo di l'acquisto di Cremona, come ho scritto di sopra, et che Geradada et Lodi si havea mandà a oferir di levar le insegne di Franza, et che li havea mandato a risponder cussi facessero; et come havea mandà esso capitano ze-

neral a Brexa uno trombata a dimandarli la terra, si non li manderia soto exercito.

*Di Crema, di sier Bortolomio Contarini capitano, di 28.* Come, per uno suo explorator, havea che el Ducheto con alcune sue zente et alcuni spagnoli erano andati verso Tortona per esser a le man con francesi, et che erano stà roti et preso el Ducheto; *tamen* lui non la credeva, e non fu vera. *Item*, avisa, spagnoli, ch'erano andati 7 mia avanti, erano tornati a Piasenza et ivi stavano fermi.

*Di Zenoa, in Rialto, si ave aviso certo,* come il caso fo dito seguì a Zenoa è certo, e cussi dice aver letere al Monpinelo, e che fo a di 24 che missier Janus era stà cazato fuora, et che suo fratello Fregosin havea morto el fiol fo di missier Zuan Alvisè dal Fiesco nominato . . . . ., et che Zenoa si levò a remor e l'ha fato sgombrar subito essi Fregosi fuora; siehè à durato pocho doxe di Zenoa.

*Da Constantinopoli, fo letere di sier Nicolò Zustignan baylo, de 23 April.* Verifica la morte di Achmat bassà, et come el baylo era stà dal Signor alegrarsi di la vitoria, qual dimandò di l'orator nostro a lui destinato; li rispose era in camino et veria subito. *Item*, ch'el Turco voleva *omnino* far guerra al re di Hongaria e tuorli il regno, et havea licentià el suo orator dil predito re di Hongaria.

Da poi disnar, fo Pregadi per expedir la commission di sier Antonio Justinian dotor, va orator al Signor turecho, qual è spazado; aspeta *solum* la galia di sier Hironimo Capelo, ch'è in Histria, che vegna a levarlo. Va con lui secretario, Andrea di Franceschi.

Fu posto adunca, per tutti i savii d'acordo, la commission al predito orator nostro; et perchè era messo di dar certi presenti al fiol dil Signor si li se ritrovava, e li dovesse comprarli e spender fino ducati 200; et altri capitoli in ditta commission posti, e datoli libertà di reformar la pace havea il padre. Et sier Lucha Trun contradise si dovea comprar li presenti in questa terra; e sopra alcuni capitoli non li fu rispo. E fu presa.

Fu posto, per li consieri, che sier Alvixe Mocenigo el cavalier, electo orator in Franza, possi venir in questo Consejo senza meter balota fino el vadi a la sua legation; et fu presa.

*Di sier Andrea Gritti procurator, fo letere date a Villa Nova, mia 12 di là di Aste, de dì 23.* Avisa il suo zonzar li, come el saria subito in Aste e veria poi in Alexandria a trovar missier Zuan Giacomo e le altre zente francese, dove li in Aste voleva riposar 4 zorni; et che francesi venivano via